

Vene in Collegio el Legato del Papa episcopo de Puola, per el qual fo mandato, et fo persuaso per el Serenissimo a dover restituir la caixa dove l'habità al duca de Ferara iusta li capitoli fatti, perchè *etiam* Codignola è stà ordinato di dargela. Et fo fato lezer una lettera scrive el Duca a la Signoria sopra questa caixa pregando la ge sia fatta dar, sì per esser nostro zentilhomo et vol haver domicilio in questa terra, come per altre cause, *ut in litteris*. Et li fo leto la forma del capitolo zerca el restituir la caixa, *unde* esso Legato se dolse assai che la soa caixa li fosse tolta senza aldirlo, dicendo l'havia hauta da do Pontefici a galder in vita sua, havea speso assà danari dentro perchè la ruinava, lachrimando, et havia scritto al cardinal Cibo, et se doveria cometer a un Collegio de Savi, a veder le raxon sue; concludendo, la liga, volendo la caixa, li doveria dar benefici a l'incontro.

Da poi monstroe una lettera hauta de Romagna, con aviso el Papa esser accordato con cesarei, et esser in libertà, et fa 3 cardinali napolitani con haver danari; et altre particolarità, *ut in ea*.

Et nota. Se dice el cardinal Trane, ch'è qui a Muran, ha hauta *etiam* lui questo aviso, et di più che l'Datario episcopo de Verona, qual è li a Roma obstaso di cesarei, era morto.

Vene l'orator de Fiorenza, iusta el solito. Parloe in conformità de quanto havemo dal nostro Orator.

Vene l'orator de Milan, con avisi de l'ussir de inimici fuora de Milan, et

Vene l'orator di Mantoa, et comunicoe avisi hauti dal suo signor dal cavalier Caxalio orator di Anglia, et Lorenzo Toschan per nome di monsignor di Lutrech.

Da poi disnar fo Conseio di X con la Zonta, et fo parlato in materia de formenti, perchè non se ne pol haver molti etc., et la farina val lire 15.

222 Fu posto certo numero in Fontego di S. Marco di orzo li do terzi, et una parte de formento a lire 9; et li poveri se amazavano in Fontego per haverne, *tamen* si deva *solum* mezo ster per persona.

Fo posto, la gratia de sier Zacaria Morexini electo capitano a Bergamo et passà il tempo de mexi . . . et mandò le soe robe fino a Verona poi le fè ritornar, et non vol andar. Ha portà una suplica, sia fatto in lui quello è stà fatto in sier Zuan Pixani che refudò podestà a Verona, *vide-*

licet che ducati . . . imprestoe per remanir, possi scontar in le sue angarie.

Et fo balotà do volte, non fu presa. Ave: 16 di sì, 11 di no.

Vol li do terzi, la pende, se meterà uno altro Conseio.

Fo posto, per i Cai, che quelli hanno refudà rimasti per danari et refuderano, la Signoria scuodi per loro nome le rate de l'imprestedo, i qual danari siano de le presente occorentie. Et fu presa.

Fu posto, et preso tuor 18 milia ducati di danari del sal per li sali se ha hauta de Zervia, et quelli mandarli al procurator Pexaro.

A dì 5. La matina, fo *lettere di Parma del procurator Pexaro*, zerca se mandi danari.

Veneno in Collegio monsignor Baius orator de Franza, con . . . orator di Lutrech, el qual, sentati, apresentò la lettera di credenza; el qual se dolse che la Signoria non teniva el numero de le zente l'era obligata tenir per li capitoli.

Vene l'orator de Ingalterra.

Da poi disnar, fo Collegio di la Signoria con li 222* Savii.

Di Franza, vene lettere di sier Sebastian Justinian el cavalier, orator nostro, di 7 . . . et 17.

Fra le altre cose, avisa esser stà dato al Christianissimo re per li oratori anglici l'ordine de San Zorzi overo la Garatiera, zoè cento, una cintura a la gamba, postoli indosso uno vestido di veludo ponzazo fodrà d'ariento, et la insegna.

Di Anglia, di sier Marco Antonio Venier el dotor orator nostro, da Londra, di 8 et 11. In la prima scrive, come qui, per hora, se fa li honori grandi a questi oratori francesi, et a questi di per questo reverendissimo Cardinal a lo illustrissimo Gran maestro, havendolo tenuto per tre zorni a Anticurt a caze, dove era richamente apparato el palazo, et ancor se ritrovava li per bel veder le credentiere che à esso reverendissimo de peri (?) d'oro, che qui vien ditto stimarsi per ducati 300 milia. In vero sono peri assai et grandi, et d'oro, come è vasi bazili et poti et simili instrumenti. Da poi el serenissimo Re lo menò a la caza in una campagna, dove li dete disnar honorevole li in campagna, sotto alcune fabriche per questà impresa fate circumdar de verdure. Doman ditto orator darà la insegna del Christianissimo a questo Serenissimo; da poi Marti si partirà esso monsignor Gran maestro, al qual se li fa amorevol officio, et de qui restarà el vescovo de Baiona. Scrive, per la carestia è de qui